



Број/Број: 03/1-50-1-7-43/09

Сарајево/Сарајево: 28.9.2009.

ČLANOVIMA ZAJEDNIČKE KOMISIJE ZA ODBRANU I SIGURNOST

INFORMACIJA O BILATERALNOJ POSJETI INSTITUCIJAMA REPUBLIKE

SLOVENIJE, 24. i 25. 9. 2009.

Veza, akt broj: 03/1,03/11-05-332/09

U skladu s Orijentacionim planom aktivnosti za 2009. godinu, Zajednička komisija za odbranu i sigurnost je, 24. i 25. 9. 2009., boravila u bilateralnoj posjeti institucijama Republike Slovenije. Posjeta je realizirana uz podršku Odjela za sigurnosnu saradnju Misije OSCE-a u BiH.

U delegaciji Zajedničke komisije za odbranu i sigurnost BiH na ovom studijskom putovanju bili su: Šefik Džaferović, prvi zamjenik predsjedavajućeg Zajedničke komisije za odbranu i sigurnost BiH, Jozo Križanović i Mirko Okolić, članovi Komisije, Jovica Katić, stručni saradnik u Zajedničkoj komisiji, te Jasna Dragičević i Šejla Begtašević, predstavnice Odjela za sigurnosnu saradnju Misije OSCE-a u BiH.

24. 9. 2009.

Prvi dan članovi Komisije posjetili su Državni zbor Republike Slovenije, Ministarstvo odbrane, te Generalštab Oružanih snaga Republike Slovenije.

Prilikom posjete Državnom zboru, delegaciju Zajedničke komisije je najprije primio zamjenik predsjednika Državnog zbora Vajs Klavor. Tokom razgovora članovi Zajedničke komisije za odbranu i sigurnost BiH upoznati su s organizacionom strukturom Državnog zbora Republike Slovenije i načinom njegovog funkcioniranja. Razgovarano je o privrednoj saradnji Bosne i Hercegovine i Slovenije, koja je ocijenjena izuzetno dobrom, kao i o nastojanjima Republike

Slovenije da pomogne Bosni i Hercegovini na njenom putu ka evropskim i evroatlantskim integracijama. Predstavnicima Zajedničke komisije su tom prilikom uputili molbu gosp. Klavoru da predstavnici Republike Slovenije u institucijama EU svojim autoritetom pomognu Bosni i Hercegovini na putu liberalizacije viznog režima za njene građane.

Nakon toga članovi Zajedničke komisije susreli su se s predsjedavajućim Odbora za odbranu Državnog zbora Jožefom Jerovšekom i predsjedavajućom Odbora za poslove EU Darjom Lavtižar Bebler. Na ovom sastanku članovi Zajedničke komisije upoznati su sa strukturom, nadležnostima, te dosadašnjim radom i rezultatima rada ovih odbora, zatim o djelovanju Slovenije unutar institucija NATO i EU, te ukupnim iskustvima Republike Slovenije po pitanju životnog standarda njenih građana unutar EU. Predstavnicima ovih odbora Državnog zbora, s druge strane, upoznati su s nadležnostima rada Zajedničke komisije za odbranu i sigurnost BiH, akterima sigurnosnog sektora u BiH, strukturom Oružanih snaga BiH i zakonodavstvom koje regulira ovu oblast, kao i ulogom koju visoki predstavnik u BiH ima u konsolidaciji normativa u ovoj oblasti, te s trenutnom situacijom u kojoj se BiH nalazi na putu ka NATO-i i EU. Razgovarano je još i o saradnji pozicije i opozicije u Državnom zboru po dnevno-političkim pitanjima od interesa za institucije vlasti Republike Slovenije, zatim iskustvima Odbora za odbranu Državnog zbora po pitanju donošenja budžeta, imenovanju na generalske pozicije u Oružanim snagama Slovenije, odnosu ovog odbora s Ministarstvom odbrane, te učešću Oružanih snaga Republike Slovenije u okviru misija NATO-a u inozemstvu, s posebnim osvrtom na misiju ALTEA u BiH, za koju je istaknuto da će u narednom periodu doći do dodatnog smanjenja pripadnika OS Slovenije. Ocijenjeno je da je izuzetno važno da sva osjetljiva pitanja, pa tako i vojna, budu pod demokratskim nadzorom parlamenta. Delegacija BiH zahvalila se na cjelokupnom dosadašnjem angažmanu OS Slovenije koju su one imale na očuvanju mira u BiH tokom posljednjih 12 godina, te i ovim putem zamolila predstavnike Državnog zbora da u skladu sa svojim mogućnostima pomognu Bosni i Hercegovini na njenom putu ka evropskim i euroatlantskim integracijama, naglašavajući da će prijem zemalja zapadnog Balkana u ove integracije sigurno uticati na poboljšanje ukupne političke situaciju u regionu Jugoistočne Evrope.

Šefik Džaferović, zamjenik predsjedavajućeg Zajedničke komisije za odbranu i sigurnost BiH je, po završetku ovog sastanka, predsjedniku Odbora za odbranu Državnog zbora Republike Slovenije Jožefu Jerovšku uručio poklon - Znak PSBiH u ramu.

Nakon toga članovi Zajedničke komisije su se sastali s predsjedavajućim Komisije za nadzor obavještajno-sigurnosnih službi Zvonkom Černačem, te članovima ove komisije Vinkom Gorenakom i Gvidom Kres. Članovi ove komisije prezentirali su svoju organizacionu strukturu,

ustanovljenu na osnovu Zakona o parlamentarnom nadzoru, potom sastav Komisije, odnos pozicije i opozicije unutar Komisije, te odnos ove komisije prema javnosti. S druge strane, članovi Zajedničke komisije za odbranu i sigurnost BiH upoznali su predstavnike ovog odbora sa svojom organizacionom strukturom, sastavom i nadležnostima, kao i s organizacijom rada i djelovanjem Zajedničke sigurnosno-obavještajne komisije za nadzor nad radom OSABiH, koja vrši parlamentarni nadzor nad obavještajno-sigurnosnim sektorom u BiH, te pojasnila osnovne postulate organizacione strukture ove agencije. Naglašeno je da je BiH dosadašnjim izmjenama svog zakonodavstva iz ove oblasti učinila značajan iskorak ka usaglašavanju svojih zakonskih propisa sa zakonodavstvom EU, te navedeno da je u toku procedura donošenja Zakona o parlamentarnom nadzoru, čime bi proces približavanja BiH Evropskoj uniji po u ovom segmentu bio zaokružen. Tokom ovog sastanka razmijenjena su dosadašnja iskustva Bosne i Hercegovine i Slovenije po pitanju zaštite tajnih podataka, sigurnosnih provjera članova Parlamenta i drugih izabраниh i imenovanih zvaničnika vlasti s ciljem pristupa tajnim podacima, imenovanja direktora obavještajno-sigurnosnih agencija, zatim odnosa i saradnje ovih komisija s vojno-obavještajnim strukturama, kao i pitanja zakonitog presretanja telekomunikacija, te o transparentnosti informacija predstavnicima medija od agencija koje se bave poslovima obavještajno-sigurnosnog karaktera.

Članovi Zajedničke komisije su potom posjetili Ministarstvo odbrane Republike Slovenije, gdje ih je primila ministrica odbrane Republike Slovenije Ljubica Jelušič. Osim ministrice Jelušič, iz Ministarstva odbrane Republike Slovenije sastanku su prisustvovali: Jerica Pavišič, Aleš Mišmaš, Aljoša Selan, Miloš Bizjak, Zlatko Vehovar i Damir Črnčec. Tokom sastanka članovima Zajedničke komisije prezentirane su tri teme:

1. Dvostrano učešće na odbrambenom i vojnom polju i u oblasti sigurnosti pred prirodnim i drugim nesrećama;
2. Sigurnosna služba Oružanih snaga Republike Slovenije, te
3. Odbrambeno planiranje finansijskih resursa.

Članovi Zajedničke komisije zahvalili su se ministrici odbrane Republike Slovenije na dosadašnjem angažmanu vojnika ove zemlje u okviru misije ALTEA u BiH, te izrazili nadu da će Slovenija, kao punopravna članica EU i NATO-a, nastaviti pružati podršku našoj zemlji na putu ka ovim integracijama. Predstavnici Ministarstva odbrane su se, pak, zahvalili i čestitali Bosni i Hercegovini na uspješno organiziranoj vojnoj vježbi NATO-a „Združeni napor“, koja je nedavno okončana u Banjoj Luci, naglašavajući da je naša zemlja organizaciono ispunila sva očekivanja koja je NATO stavio pred nju. Tokom sastanka delegacije su još razgovarale o učešću misija ove dvije zemlje u misiji ISAF u Afganistanu, regionalne saradnje na vojnom i sigurnosnom polju, te o reformskim procesima u BiH nastalim provođenjem Programa tranzicije i zbrinjavanja personala Ministarstva

odbrane i Oružanih snaga BiH „Perspektiva“ i iskustvima Republike Slovenije po ovom pitanju. Navedeno je i da je Ministarstvo odbrane Republike Slovenije u saradnji s Ministarstvom sigurnosti BiH pripremio zajednički dokument kojim će ove dvije zemlje regulirati pitanje zaštite od prirodnih i drugih elementarnih nepogoda, te izrazili nadu da će resorni ministri što prije potpisati ove međunarodne ugovore.

Šefik Džaferović, zamjenik predsjedavajućeg Zajedničke komisije za odbranu i sigurnost BiH, je po završetku ovog sastanka uručio ministrici odbrane Republike Slovenije poklon - Znak PSBiH u ramu, dok je Ljubica Jelušič, s druge strane, bh. delegaciji uručila poklone u formi brončanog novčića s grbom Republike Slovenije i potpisom ministrice odbrane.

Članovi Zajedničke komisije su se potom sastali s načelnikom Generalštaba Oružanih snaga Republike Slovenije general-majorom Alojzom Štajnerom. Osim načelnika, iz Generalštaba sastanku su prisustvovali i potpukovnik Zoran Vubič te potpukovnik Mojca Pešec. Predstavnici Generalštaba OS Republike Slovenije su u svojoj prezentaciji članovima Zajedničke komisije predstavili strukturu, opseg i formacije slovenačke vojske, prezentirali finansijski okvir za njeno djelovanje, apostrofirali međunarodne operacije i misije, te ih upoznali sa sistemom civilnog nadzora nad Oružanim snagama. Istakli su da su ključne elemente u tranziciji slovenačke vojske predstavljali odluka o nezavisnosti Republike Slovenije, zatim reorganizacija OS Slovenije kojom se broj profesionalnih vojnih lica u 2003. reducirao sa 76.000 na 26.000, zatim pristupanje Republike Slovenije Evropskoj uniji i NATO-u 2004. godine, te nakon toga i daljnja reorganizacija vojske u smislu profesionalne integracije, kojom danas OS Slovenije imaju 10.000 vojnika. Članovi Zajedničke komisije upoznali su svoje domaćine sa putem BiH ka integracijama NATO-a, ističući da je Predsjedništvo BiH na tom putu podnijelo zahtjev za pristupanje naše zemlje MAP-u, te naglasili potrebu što skorijeg prijema svih zemalja zapadnog Balkana evroatlantskim integracijama, jer bi time došlo do unapređenja odnosa u cijelom regionu.

25. 9. 2009.

Drugi dan članovi Zajedničke komisije posjetili su Ministarstvo unutrašnjih poslova Republike Slovenije, gdje ih je primila Tatjana Bobnar, zamjenica generalnog direktora policije. Iz MUP-a Republike Slovenije sastanku su prisustvovali još i Marko Gašpelin, pomoćnik direktora uniformirane policije, Robert Čerepinko, pomoćnik direktora kriminalističke policije, te Helena Jagodic, sekretar Ministarstva. Članovi Zajedničke komisije su tokom ovog sastanka upoznati s određenim brojem zajedničkih projekata slovenačke policije i MUP-a, od čega je svakako najveći projekat osnivanje Nacionalnog istraživačkog ureda Slovenije, koji će početi raditi početkom

naredne godine, a koji će svojom organizacijom i djelovanjem biti uređen po uzoru na Federalni istražni biro (FBI) Sjedinjenih Američkih Država. Ova institucija bit će u sklopu kriminalističke policije i potpuno nezavisna od bilo kakvih političkih uticaja. Predstavnici MUP-a Slovenije su nadalje istakli visok procenat rasvijetljenosti ukupnog broja krivičnih djela, pri čemu na raskrinkavanje teških krivičnih djela otpada čak 90 %, dok na ostala krivična djela, uglavnom privrednog karaktera, otpada oko 50 %. Razgovarano je još i o organizaciji uprave kriminalističke i uniformirane policije, njihovoj međusobnoj saradnji i oblasti djelovanja, djelovanju slovenačke granične policije, zatim postupku reorganizacije slovenačke policije, refleksijama Lisabonskog ugovora na djelovanje i rad policijskih organa u Republici Sloveniji, važećem zakonodavstvu koje regulira policijska ovlaštenja, a u prvom redu krivičnog zakona i zakona o krivičnom postupku, te saradnji MUP-a i policije sa Državnim zborom i nadležnim odborima koji vrše parlamentarni nadzor nad radom ovih tijela. Tokom razgovora poseban značaj dat je iskustvu Republike Slovenije po pitanju oduzimanja nelegalno stečene imovine, sa osvrtom na osnivanje posebne agencije koja bi njome upravljala do završetka sudskog postupka, prilikom čega je navedeno da su državni zvaničnici Republike Slovenije upoznati sa iskustvima zemalja koje imaju uspostavljenu takvu agenciju, ali da Slovenija nema ovakvu instituciju, te da se unutar vladinih i parlamentarnih krugova, kao i cjelokupne javnosti vodi rasprava o mogućnosti njenog osnivanja. Ovako kompleksnom pitanju dat je poseban značaj, s obzirom da organizirani kriminal sve više postaje svjetski problem koji je jači i od same države i njenog aparata.

Nakon sastanka u Ministarstvu unutrašnjih poslova, članovi Zajedničke komisije prisustvovali su radnom ručku s članovima parlamentarne grupe prijateljstva s Bosnom i Hercegovinom. Zamjenik predsjedavajućeg Zajedničke komisije se ovom prilikom zahvalio svim predstavnicima Državnog zbora Republike Slovenije na gostoprimstvu i pozvao ih da u što skorije vrijeme dođu u uzvratnu posjetu Parlamentarnoj skupštini BiH i Zajedničkoj komisiji za odbranu i sigurnost BiH.

**Prvi zamjenik predsjedavajućeg
Zajedničke Komisije za odbranu i sigurnost BiH**

Šefik Džaferović

Dostavljeno:

- naslovu
- a/a